

Nuttarnerulersitsiniarluni tapiissutit pillugit Namminersornerullutik Oqartussat nalunaarutaat

Suliffeqarnermi innersuussisarneq il.il. pillugit Inatsisartut peqqussutaat nr. 10, 18. december 2003-meersumi § 7, imm. 2 naapertorlugu aalajangersarneqarpoq:

Nassuiaatit pillugit aalajangersakkat

§ 1. Najukkatut angerlarsimaffigisatut paasineqassaaq Kalaallit Nunaanni illoqarfik nunaqarfilluunniit sulinermik inuussutissarsiuteqartup najugaqarfigisaa inuillu allattorsimaffianni nalunaarsorsimaffigisaa.

Imm. 2. Aappariittut katissimasutut inooqatigiinnertut naligiissinneqarput inooqatigiittut, 18-inik ukioqalereermik kingorna, ukiumi ataatsimi aappariittut inooqatigiittut peqatigiillutillu inuit allattorsimaffianni nalunaarsorneqarsimasut.

Imm. 3. Sulinermik inuussutissarsiuteqartutut paasineqassaaq suliffissaaleqisoq suliffeqarnermi innersuussisarfimmuut nalunaarsimasoq atorfimmullu innersuunneqartumut sulisitsisumit atorfinitsinneqartoq, taamatullu sulisitsisup ilitseruussisussaataitaneranut malitassaqartinneqartoq.

Atuuffik

§ 2. Aningaasanut inatsimmi aningaasaliissutigineqartut iluanni nuttarnerulersitsiniarluni tapiissutinik aningaasaliissuteqartoqartarpoq sulinermik inuussutissarsiuteqartunut suliffimmik innersuunneqarnerminni isumaqatigiissut sulinermik inuussutissarsiuteqartunut pineqartunut atuuttoq naapertorlugu atorfininnermut angalanissamut pigisallu nuunneqarnissaannut akiliunneqarsinnaanngitsunut.

§ 3. Inuussutissarsiornermut, Suliffeqarnermut Inuussutissarsiutinullu llinniartitaanernut Naalakkersuisoqarfik suliffeqarnermi kommunini innersuussisarfiit suliffinnik innersuussisarnerannut atatillugu atorfininnermut angalanissamut pigisallu nuunneqarnissaannut aningaasaliissuteqarsinnaavoq, tamatumani

1) sulinermik inuussutissarsiuteqartoq najukkatut angerlarsimaffigisami avataani suliffissamik innersuunneqarpat,

2) sulinermik inuussutissarsiuteqartoq ataavartumik atorfeqalernissaq siunniullugu atorfinitsinneqarpat, aamma

3) piffissami qaninnerusumi naatsorsuutigineqarsinnaanngippat suliffik najukkami sulisartunit najugaqartunit inuttalerneqarsinnaassasoq.

Tapiissutit annertussusiat

§ 4. Sulinermik inuussutissarsiuteqartumut, taamaattoqarpallu taassuma aapparisaanut qitornaasunullu 18-it inorlugit ukiulinnut angerlarsimaffimmilu sulii najugaqartunut atorfininnermut angalanissamut akiliuteqartoqassaaq. Atorfininnermut angalanissaaq sapinngisamik ataatsimoorluni ingerlanneqassaaq najukkamut angerlarsimaffigiligassamut angallavissaaq tamanit atorneqarsinnaasooq akikinnerpaaq atorlugu.

Imm. 2. Atorfininnermut angalanermi pineqarput bilitsinut aningaasartuutit tamakkiisumik akiliussineq.

Imm. 3. Angalariaaseq alla atorneqarpat taassumunnga aningaasartuutit uppersaasikkat matussuserneqassapput, taamaattoorli angallavissamut tamanit atorneqarsinnaasumut akikinnerpaamut bilitsip akia qaangernagu.

§ 5. Pigisat nuunneqarnissaannut tapiissuteqartoqartarpoq imm. 2-miit 6-imut aalajangersakkat malillugit, taamatullu aamma maleruagassat tjenestemandinut atuuttut malillugit.

Imm. 2. Kisimiittut pigisaasa nuunneqarnissaannut tapiissuteqartoqartarpoq 15 m³-it nalingi angullugit. Imaatigut assartuinnermut assartuussinnermullu nalinginnaasumik sillimmasiisoqartarpoq sillimmasiussat nalingi 182.500 kr.-nit angullugit.

Imm. 3. Apparit pigisaasa nuunneqarnissaannut tapiissuteqartoqartarpoq 30 m³-it nalingi angullugit. Imaatigut assartuinnermut assartuussinnermullu nalinginnaasumik sillimmasiisoqartarpoq sillimmasiussat nalingi 364.800 kr.-nit angullugit.

Imm. 4. Qitornarisamut ataatsimut pigisat nuunneqarnissaannut tapiissuteqartoqartarpoq ilassutit 5 m³-it angullugit. Imaatigut assartuinnermut assartuussinnermullu nalinginnaasumik sillimmasiisoqartarpoq sillimmasiussat nalingi ilassutit 60.800 kr.-nit angullugit.

Imm. 5. Pigisat nuunneqarnissaannut ilaapput pigisat poortorneri, poortuutissat, assartorneri puuarneqarnerilu. Pigisat nuunneqarnerannut ilaangillat nussumit nalinginnaasut saniatigut pigisanik toqqorsivinniititsigallartarnerit.

Imm. 6. Pigisat nuunneqarnissaannut aningaasaliissuteqartoqareerpat pigisalli atorfininnermut angalanissamut attuumasumik umiarsuartigut assartorneqariaannaanngippata, tamanna pissusissamisoortumik uppersaasereerlugu, nassatat inummumut ataatsimut 10 kiilut angullugit qaangerneqarsinnaanissaannut matussusiisoqarsinnaavoq.

Aqutsineq aamma akiliuteqartarnek ilaalu ilanngullugit

§ 6. Kommunit najukkani suliffissarsiuussisarfii Inuussutissarsiornermut, Suliffeqarnermut Inuussutissarsiutinullu Ilinniartitaanernut Naalakkersuisoqarfimmut qinnuteqaatinik nassiuussissapput sulinermik inuussutissarsiuteqartup aamma sulisitsisup akornanni atorfininnermut isumaqatigiissuteqartoqaleripat.

Imm. 2. Inuussutissarsiornermut, Suliffeqarnermut Inuussutissarsiutinullu Ilinniartitaanernut Naalakkersuisoqarfik aalajangiissaaq nuttarnersitsiniarluni tapiissutinik aningaasaliisoqassanersoq. Aalajangiineq pissaaq najukkami, sulinermik inuussutissarsiuteqartup innersuunneqarfigisaani, sulisartunik piginnaasalinnik pisariaqartitsinermik ataatsimut naliliineq tunngavigalugu.

Imm. 3. Inuussutissarsiornermut, Suliffeqarnermut Inuussutissarsiutinullu Ilinniartitaanernut Naalakkersuisoqarfik qinnuteqarnissamut immersuiffilianik suliaqarsinnaavoq suliffissarsiuussisarfiit nuttarnersitsiniarluni tapiissutitut aningaasaliissutinik qinnuteqartarnissaminut atatillugu atugassaannik.

§ 7. Kommunini najukkani suliffissarsiuussisarfiit nuttarnersitsiniarluni tapiissutit qinnuteqaatit suliarinissaannut atasumik paasissutissat pisariaqartinneqartut tamaasa Inuussutissarsiornermut, Suliffeqarnermut Inuussutissarsiutinullu Ilinniartitaanernut Naalakkersuisoqarfimmut nalunaarutigisassavai, ilanngullugit paasissutissiissutigineqareersut pillugit allannguinerit.

§ 8. Kommunip sulinerimik inuussutissarsiuteqartup najukkatut angerlarsimaffigisaata aningaasartuutit tapiissutit aningaasaliissutigineqartut naapertorlugit akilertassavai.

Imm. 2. Kommunip aningaasartuutit Inuussutissarsiornermut, Suliffeqarnermut Inuussutissarsiutinullu Ilinniartitaanernut Naalakkersuisoqarfimmit utertitsissutigissavai aningaasartuutit pineqartut aningaasaliissutigineqartut naapertorlugit atorineqareerpata.

§ 9. Inuussutissarsiornermut, Suliffeqarnermut Inuussutissarsiutinullu Ilinniartitaanernut Naalakkersuisoqarfiup aalajangersinnaavaa nuttarnersitsiniarluni tapiissutit utertillugit akiliutigineqassasut, tamatumani

1) sulinerimik inuussutissarsiuteqartoq tapiissutit aningaasaliissutigineqarnissaannut sunniuteqartumik paasissutissanik eqqunngitsunik mianersuaalliorluni tunniussaqaarsimappat,

2) sulinerimik inuussutissarsiuteqartoq tapiissutit aningaasaliissutigineqarnissaannut sunniuteqartumik paasissutissanik piaaraluni isertuussisimappat, imaluunniit

3) sulinerimik inuussutissarsiuteqartoq nutaamik atorfinitsitaaffigisaminit atorfininnermi kingorna qaammatit arfinillit ingerlaneranni pisussaaffigisaminik sumiginnaasimanini pissutigalugu soraarsitaasimappat.

Naammagittaalliuteqartarneq

§ 10. Inuussutissarsiornermut, Suliffeqarnermut Inuussutissarsiutinullu Ilinniartitaanernut Naalakkersuisoqarfiup matumani nalunaarut naapertorlugu aalajangiineri pillugit aqutsinikkut oqartussanut allanut naammagittaalliutitineqarsinnaanngillat.

Atuutilerfia

§ 11. Nalunaarut atuutilerpoq ulloq 15. september 2008, atuutissallunilu nuttarnersitsiniarluni tapiissutit pillugit ullup taassuma kingorna qinnuteqaatinut.

Imm. 2. Matuma peqatigisaanik nuttarnersitsiniarluni aningaasaliissutit pillugit Namminersornerullutik Oqartussat Nalunaarutaat nr. 6, 15. marts 2008-meersoq atorunnaarpoq.

Namminersornerullutik Oqartussat, ulloq 25. august 2008

Siverth K. Heilmann

/

Bent Sørensen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut